

Portisson

Per de qué tornar editar *Pescas d'Òlt* de Zefir Bòsc del temps que mantun escrivan tústa pel tambarat del *Convise* per èstre publicat ?

D'en primièr segur, la pesca es una activitat plasenta, que còmpta belcòp dins nòstra encontrada que rius e ribièiras i píssan de pertot. Tals los amassaires de botaròts o de cagalièchs a la sason, pescairas e pescaires víson un riti de civilizacion que dóna sens a la vida, saviesa e equilibri, en s'aplicar a çò qu'òm fai, mai se, uèi, pescairèls o pescafins péscan mai per plaser que per besonh. Es aquel ligam civilizacional qu'explica la capitada e l'agotament de la primièra edicion limitada (1990) d'aquel libre qu'auguèt pas lo temps d'esperar sus las limandas dels libraris e que tot lo monde poguèt pas crompar.

Cal ajustar tot cotiment qu'ambe lo temps, lo majoral Zefir Bòsc s'es impausat coma lo desplegaire mestre de las riquesas occitanas del Naut-Miègjorn, gabarras, vinhas, contes, cançons, poesias, ont sas òbras se son conhadas naturalament. Los discourses en favor de las lengas regionalas, dels còps, los tròbi dessubstanciats, mentre que dins *Pescas d'Òlt* tot prend vida. La bèla ribièira Lòt, nascuda al país gavalde, onorada per Truèire, atirada per l'oèst, nos embelina ambe sos rabègs e sas gorguièiras, sas aigassas e sos mèrmes, sos pescaires aventurós o fadejaires, sos pèisses abondoses, salmons, enguilas, trochas, cabòts, sièges, sos mulets, sas legendas... tot aquò ambe una

preocupacion documentària precisa per presentar las tecnicas e los espleches de pesca. Escrivan, istorian, etnograf, estacat a son país avaironés, sos estatjants, sa lenga, aital es Zefir Bòsc. L'obratge es bilingüe – version occitana, version francesa –, dóna un preciós glossari de la pesca e es illustrat per de dessenhs e bon nombre de fotòs e cartas postalas.

Associar aital istòria, geografia, lenga regionala e nacionala, civilizacion, pel plaser de totes, es lo bon biais per parlar uèi dels païses d'òc. Los professors d'escòla o de lenga occitana aun dins aquel libre de ressorças per un ensenhament d'avenir qu'ignorèssa pas lo local. En quant a ieu, amator e generator de convises – aqueles rescontres altorn d'una persona que parla en òc d'un subjècte que coneis plan –, me ven a l'idèia qu'aquel libre es coma un convise abotit, un convise dont lo contingut es porgit tot prèste, aisat e fidèl, dubèrt a totes, saber d'òc requist que se seriá percut sens las cèrcas d'un òme a la soca del país, un bèl felibre de fe. Zefir Bòsc es d'alhors un animador de convises inoblidables, a la poncha del Puèch de Bana dins lo Cantal, sus las piadas dels Enfarinats dins la ribièira de Gol e a la Vinzèla, sus las còstas del Fèl generosas de vin...

Bonas pescas d'Òlt !

Nadal Lafont.